

AMARUBA EMWA FILEMONI

Enshokolezi oku maruba emwa Filemoni

Oyo mulume mushigwa Filemoni aligwêrhe omujà, ye wali Onezimo. Filemoni abatizibwa ahinduka mukristu. Omujà ayâka Nnawâbo n'obwo okwo kwâli kucîhira omu kâga. Lêro erhi acirhigâna Paolo, Onezimo ayêmêra Yezu anabatizibwa. Bulya Paolo akengaga obubatizo burhujira bantu bahyâhya, agerêreza erhi: «Oyu wali mujà akola mwene wîrhu erhi bubatizo burhuma; kandi akola mwene wâbo Filemoni na ntyo Filemoni naye ali mwene wîrhu.» Nkaba akengêra birya ayandikiraga Abagalasiya (3, 27-29), halya adesire oku ababatizibwe barhacirimwo kabôlo ekarhî K'Omuyahudi n'Omugereki, kwo kuderha orhali Muyahudi, ntagengwa n'omujà, omulume n'omukazi. Go mango ayandikire Filemoni aga maruba. Mofi ci galimwo emyanzi.

Omusingo

¹ Paolo, mubohe wa Kristu Yezu, na mwene wîrhu Timoteyo, kuli Filemoni, murhabâzi wîrhu muzigirwa,

² na mwâli wîrhu Afiya*, n'owîrhu rhulwa entambala rhweshi naye, Arkipo†, haguma n'endêko y'abemêzi babugânana aha mwâwe:

* **1:2 1, 2** Afiya: Nkaba mukà Filemoni oyo. † **1:2 1, 2** Arkipo: Nkaba mugala wa Filemoni.

³ enshôkano n'obuholo bimmugabirwe na Larha Nyamuzinda na Nyakasane Yezu Kristu!

Paolo avuga omunkwa

⁴ Ntahusa kuvuga Nyamuzinda wâni omunkwa nka nakukengêra omu nsengero zâni,

⁵ bulya nankâyumva baderha obuzigire n'obuyêmêre bwâwe kuli Nyakasane Yezu n'oku batagatîfu boshi.

⁶ Owabona ecinyabuguma c'obuyêmêre bwâwe ciyôrha cikanyire cinakurhabâle okumanya aminjâ goshi rhwankahash'ijira erhi Kristu orhuma!

⁷ Nêci okuli, mwene wîrhu, nsîmire bwenêne nanayumva oburhûlirize erhi buzigire bwâwe burhuma, bulya warhulirize emirhima y'abatagatîfu.

Paolo alagira Onezimo

⁸ Co cirhumire, ciru akabà ngwêrhe obuhashe muli Kristu bw'okukurhegeka ebi okwânîne okujira,

⁹ nnonzize nkuyinginge erhi kwo erhi buzigire burhuma. Nie Paolo, olya mushosi Paolo, oli bunu mubohe wa Kristu Yezu!

¹⁰ Nsengerîre mugala wâni naburhiraga omu mpamikwa‡, oyûla Onezimo.

¹¹ Mîra ntâco akukwânîne, ci lêro bunôla akola âkukwânana bwenêne, anankwânîne nâni.

¹² Y'oyo nkurhumîre; ye murhima gwâni.

¹³ Nankasîmire mmuyôrhane, nti antabâle ahâli hâwe muno nkoba ndimwo erhi Myanzi y'Akalembe erhuma;

‡ **1:10 1, 10** Naburhiraga omu mpamikwa: Erhi Paolo amyigîriza Onezimo enjira y'obuyêmêre, amuburha iroho.

¹⁴ ci naderha nti ntankajira akantu ntanakudôsize, nti lyo orhasêzibwa okujira ecinjà, ci ocikole oku bulonza bwâwe.

¹⁵ Nkaba Onezimo arhanzir'ikubunga mango masungunu mpu muyish'ibêra naye ensiku n'amango,

¹⁶ ci arhaciri nka mujà wâwe, ci kulusha omujà: nka mwene winyu muzigirwa. Ali ye lwoshi lwoshi kuli nie; kanga kulusha abà ye kuli we oku mubiri na muli Nyakasane!

¹⁷ Lêro akabà oyêmîre oku rhuyin-jibana rhwembi, omuyankirire nk'oku wankanyankirira.

¹⁸ N'akabà akujirîre kubî, nîsi erhi akabà akubà omu mwenda, abage erhi nie oyîsh'idôsa.

¹⁹ Niene Paolo nkuyandikîre n'okuboko kwâni: nie nâkulyûle. Ntanarhama nakubwîra oku nâwe ondi omu mwenda, n'ogwo mwenda oli w'oyo wênene.

²⁰ Nêci, mwene wîrhu, onjirire okwo muli Nyakasane! Orhûlirize omurhima gwâni muli Kristu!

²¹ Nkuyandikîre n'obulangalire nti wanyumva, nnamanyire oku wajira ciru n'ebilushire ebi mpûnyire.

Akanwa kazinda, omusingo n'obwangà

²² Onteganyize n'ecirâlo, bulya ndangâlîre nti n'oburhabâle bw'ensengero zinyu nammugalulirwa.

²³ Epafra rhubà rhweshi babohe muli Kristu Yezu akulamusize,

²⁴ bo na Marko, Aristarko, Dema, na Luka, bo barhabâzi bâni.

²⁵ Enshôkano ya Nyakasane Yezu Kristu ebêre
omu mirhima yinyu.

BIBLIYA NTAGATIFU OMU MASHI
The Holy Bible in the Shi language of the Democratic
Republic of the Congo: Bibliya Ntagatifu omu mashi
(Bible with Deuterocanon)
La Sainte Bible en langue shi de la République
démocratique du Congo

copyright © 2024 BUKAVU Mashi and other Kivu Languages Bible

Language: Mashi (Shi)

Contributor: BUKAVU Mashi and other Kivu Languages Bible

Bibliya aha nfune ajage n'emurhima n'omu bijiro

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

32d7d8c6-4f1f-556c-bf3d-9ed771bbfd1e